

鄉賢八

余成歲字太初州人明萬歷中拔貢生為人持循古道常恐有過遠利若浼處波流中清不絕俗和不混同恬不近名讀書務得其理所學必見諸躬行州人謂自鄒智後能步武者成歲其人也自廷試歸益殫心理學堅意不出知州羅萬象式其廬贈以匾曰孝友博洽真儒後以壽終

張乃孚合州志森楷案本傳以有出仕資格而不仕者入之若本不終能仕其不仕非隱逸也余君廷試不知經入選否舊志未經明言而視其行事頗有高士之風故以取冠本篇若舊志之以拔貢為明經本屬借用且與恩歲無分以知州為郡守雖取其有屬縣與清直隸州同而究非史體也今一切從實改稱本名以免文勝之誚

熊清洲失其名州永里南漕人世居湖北黃州府黃安縣之某鄉少讀書喜兵事特精左氏春秋傳及太公孫武黃石之學說及長以有文武才聞明末由行伍起家累官至夔州協副將闖獻之亂有防禦功後見國事日非知無可為辭職不許再三請迄不行遂挂冠去其長兄益洲仲兄淮洲以逃官為慮清洲曰無憂也遽攜妻李入川居壁山的新市

合川縣志卷四十九 鄉賢八

鎮清初其兄子自黃來相從清洲為卜今南漕以居兄子雅不樂之清洲曰新市蘇華不可遺子孫且將來必為通衢供應煩非樂土也吾亦不久于此故為汝定居南漕其土雖磽瘠而風俗淳厚無他患處而安之可為數十世福子既不樂吾將家焉遂以新市業產予從子而轉徙于南漕披荆斬棘牽蘿補茅闢荒土墾薄田日與諸僱傭操畚耒襍作煙簑雨笠意泊如也久之荒者以熟亂者以治而美地良田乃交錯阡陌茂樹修竹亦掩映林泉矣有暇則攜酒尋幽拾屨訪古大有韓王湖上之風初不自言其舊嘗備官人亦不覺其為故將軍也會清詔訪勝朝官吏量材錄用竝許其自言兄子以為請笑不應固請則曰賁軍之將不可與言勇亡國之大夫不可與圖存吾雖非實有其事而彷彿近之誅責不及幸矣願欲求榮哉且白頭再醮亦安所取汝休矣無復言遂為農夫以老年七十餘本篇有傳之熊榮相弟兄金璽父子祖孫皆其支流餘裔也餘詳見士族譜永里采訪員投稿

施開慧號蓼園州人性狷介篤學勵行博覽經史尤長于古學所為文不合有司尺度遂絕意仕進授徒濮岩寺以病卒其臨歿絕句云東郭

先生孰與傳百年書劍此時休從今高卧西岩月笑指合陽土一邱張

字合州志森楷案此人不知當清何帝之世而既入舊志則乾隆以前人也今遂次于第三

朱奐字章士號礪山一號雪邨明進士耀先五世孫也耀先自有傳奐生而穎異喜讀書能詩文以諸生領道光二十六年丙午科鄉薦明年成進士欽點卽用知縣籤分廣東廣東故大省優缺多籤出人皆賀之奐獨以父母就衰呈請終養回籍家居十一年奉事二親以孝謹聞父歿葬祭盡禮既終喪或勸之出山奐曰昔者具慶猶乞歸養今餘偏親柰何舍之遂竟不出侍奉之暇惟與二三知己詩酒往還地方公私事絕不與聞嘗以業師朱虎臣平生作詩致多歿後稿藏于家貧不能刻惻然傷之遽出重金刊行今所傳味醑軒詩集十五卷其手校也其他救難濟急敬老恤幼諸善舉多不勝數蓋秉彝攸好德其天性固然矣咸豐八年卒年三十四子培慶將婚卒以從孫金鰲嗣既卒之二年詹事府左春坊左贊善塾江李惺表其墓曰君世爲合州人得進士時年裁二十有三君念古人四十曰強強乃仕今既未逮其時而學古之功每疎是當歸而求之庶有以練其識而老其才此意既決遂不赴任徑

森楷案與爲培慶釋師關驥訂約十年先送肆百金使驥得營子母及諸善舉皆卓卓可傳者今補于此

合川縣志卷四十九 鄉賢八

二

引疾以歸歸而潛修者十年咸豐戊午三月二十二日卒于家年僅三十有四卽以是年某月某日葬於鋪山凹朱氏之塋余嘗謂天下之治亂繫於天下之讀書人何也朝廷以科目取士非徒富貴之蓋將有以用之而其所以用之者固以其研求有素確有其効用之具也顧天下讀書人多真讀書人則甚少由童生而秀才所希冀者舉人進士所循讀書者場屋之文至於將來之設施若何建樹若何不但意中不作是想卽口頭未嘗作是語一旦得官諸事憤憤甚至刻剝其民罔上營私一人如是人人莫不如是天下不能不亂久之且至於大亂然則今之所謂讀書人於世無補則亦已矣柰何階之厲而益以重其毒也大可慨已凡人謀一事其求之也專則其得之也必喜而其赴之也惟恐不及君既成進士且得知縣舉他人之所汲汲者顧反遼緩焉而徐以應之有官一若無官此其恬退之懷已與躁進者大異而況乎量而後入之別有襟期也使他日得行其志其卓然有所表見也必矣乃天顧斯之且遽折之彼顛預貪殘之輩方且久於其位老而不死豈世運之衰微已極世變而天亦與之俱變耶則尤有心人之所搔首頓足歎歎太息

而不能已已者耳君爲海輪太翁季子太翁旣歿二兄分爨君獨奉太孺人居有一姊甚貧而諸甥頗頑君欲博太孺人歡於其貧也恤之於其頑也恕之當病篤時雖痰不使有跡雖嗽不使有聲恐太孺人之見之而聞之也與人交不立厓岸然耿介不苟合尤不喜入州衙性樂施病中猶施田二百碩設鄉學一所以章士名之有餘則作貧人棺藥等費歲延親友二人經管年終彙報銷以示無私此則君生平大略也君葬急未有誌銘遺子尙幼其妻弟戴生繼典來乞余以表其墓余以君之見于外而爲事之已然者人或知之其蘊于內而爲事之未然者人或未必知之天下眞讀書人少余故備揭之俾人知讀書人尙有君一人君雖齎志以沒要已不負所學矣悲夫奩著有師竹軒詩集二卷前知州程祖潤序之曰得才士百不如得良士一良士而兼才則尤不易得者也乃旣得之而天奪之此情其何能已道光丁未余奉檄攝合州事見其山川之清淑人物之繁庶風俗之淳美則與邑中賢士大夫講求利弊所當興革而吏牘填委日不暇給久之乃得一人焉曰朱君礪山礪山年甫逾冠以丁未甲科籤分廣東知縣念親老請假旋里侍養

不出平日奉親讀書外閉戶蕭然惟與一二素心人飲酒賦詩家素封不涉時世輕靡之習余心焉異之間相過從喜其溫雅靜穆言簡而意達意其蘊養有待必將爲霖雨以福嶺南民也自余離合州十餘年間時移事易如浮雲之變幻士有自合州來者未嘗不殷殷詢之今歲秋闈州人士咸集錦城則聞礪山死矣年僅三十有四嗚呼豈所謂天者果不可問耶何奪吾良士之速也近世士風澆漓一歌鹿鳴則把持武斷無所不爲彼其人皆才士也昔之鄉紳爲鄉里益今之鄉紳爲鄉里害使一州一邑得如礪山輩數人爲之維持調護於無形之中則國人尙有所矜式而生其愧恥而今已矣余雖欲與礪山共談治理以挽斯世之頹波而烏可得哉礪山之內弟戴生繼典持遺詩求余評定將刊行以永其傳余讀盡謂戴生曰礪山之爲人不必藉詩傳者也而詩亦自足傳使天假之年則其識益老學益邃其詩當進而益上然卽今日之所成就者觀之而性情之脆摯寄興之清曠已非排比奇字以爲博雕刻紅紫以爲麗者矣黃叔度歟陳仲弓歟無庸與李昌谷輩較詩名也讀礪山詩者當知其爲良士而不徒以才士目之邑舉人彭定仁之

詞也又有師竹軒時藝二卷貢生關驥爲之序曰吾友礪山少時學文出筆卽清得于天者厚也而學力亦懋焉丙午習舉子業於蓉城閉戶數月不出飲食俱從窗進凝神一志絕外蹂以熟揣摩之功及出髮深寸餘見者無不惻然所作時藝數十篇並前澹園窗課百餘篇胞兄乳泉選其佳者彙爲一帙付之剞劂非問世也意以礪山弱冠登第條歸道山不惟於國無所表見卽於家亦少法程存數行筆墨爲子孫手澤其意深矣其情遠矣較之一經遺後何多讓焉今其二集竝行于世

修合州志李西瀝文集師竹軒詩文集興里採訪員投稿

王必成字晉廷州來里香爐山人生而竺厚父仕林教之嚴每漏盡燈殘猶聞書聲不上口不得休也所居近市屢嘗日暮自塾歸從羣兒遨忽失足墮井眾駭各竄仕林適假寐如聞有呼兒墮井者遽驚起往球得不死顧謝呼者則不可得因以是異之旣長轉穎慧讀書目數行下若夙誦然下筆輒千言往往出語驚其長老弱冠試入縣學歸讀某寺一夜有少婦來奔蘭言纏綿婉謝不去則峻詞拒卻遂無所染或微聞其事詳詢厥狀固不肯承人以是益重焉未幾餼于庠同治九年庚午

合川縣志卷四十九 鄉賢八

四

科領鄉薦再試禮部不中第遂絕意進取以養親教子爲樂不干預地方公私事不開堂講授不問家人生產引杯把卷意陶陶也惟州屬鹽課歸丁白道咸間已成定案光緒初有商人某呈請鹽道認案領引復曩日商店故事札飭到州士民大洵懇開會集議必成以爲事關民生休戚不可以置不論嘗一至州城極言利弊且領銜公呈抗阻事得已後仍敷門卻埽不至公庭者二十所年及學校事起森楷總理學務特延聘爲國文教員年六十餘矣精神矍鑠談吐風生聲如洪鐘響聽者爲聳或有疑問輒悉心剖晰滔滔不窮一時僞爲良師森楷辭退必成亦謝歸民國七年卒年八十一孫寶藩州中學校畢業生

來里採訪員投稿森楷附記

有志者曰自龔榮而下皆鄉之賢者也都凡二百三十許人何其夥與取諸舊志者半得之訪稿者三采之史傳他書者二竝本柢也其參互攷訂修飾潤色則小子之力猶十五焉要之皆有徵據無憑空虛造不知妄作者尙差堪自信余蒐羅旣眾條理維艱不分別部居將襍而述矣略以名業師儒文學行誼孝友節義公善隱逸依類次之各爲起訖

不相溷廁惟同一名業而有文治武功之異又分上下仍爲一篇不別  
題日用辟煩瑣師儒以下讀者遂可以意得之不用正史儒林文苑等  
類傳之例自爲標識凡以同爲鄉人固未可純依國史例也其有撰成  
以後收拾未盡者別爲補遺附其當篇

補遺

胡我琨字口口州東里石龍場人明侍郎世賞弟拔貢世德子也啟禎  
間以世賞恩蔭右府經歷累遷戶部湖廣司郎中世賞請告我琨亦從  
歸里以流賊肆擾官軍無足恃乃練鄉兵自保甲申之變川寇蠡起聞  
其名不敢犯幸獲安全會世賞卒王應熊保遵義遣使召往既至而守  
將王祥敗走遵義陷于賊乃從應熊走畢節應熊憂卒轉徙至夔州遇  
兵部尚書大學士呂大器間關還蜀督師討賊我琨欲與圖興復適朱  
容藩据地俾制號召徒眾我琨知無可為一夕走入山寺祝髮為僧清  
興或勸之出山不應久之卒弟我珩字玉書出嗣世賞為子以恩廕得  
監生明亡隨世賞避難鄉里世賞卒將兵西上聞王應熊在遵義乃解  
兵從我琨至遵義應熊見之大喜特題授僉事道使監軍辦蜀寇遵義  
陷走投王祥于樂居仍以故官治事祥敗為孫可望所虜不見禮走雲  
南投李定國假授吉安府知府二歲改戶部主事無可自效歲餘走回  
州順治十五年也康熙九年病卒年四十九子其儼字若思明末以祖  
恩得蔭生轉在雲南孫可望使署尙寶寺丞未到官從我珩還川繳偽

合川縣志卷四十九 鄉賢八

六

札于經略洪承疇見委雲南蒙化府儒學教授其儼便道迎家竟獲無  
恙家人私相慶幸杜門不復出矣康熙十九年滇亂初平起用故吏特  
授敘府儒學教授以道阻謝不行久之改用福建福甯府漳平縣知縣  
不敢復辭到任未久卒官年七十二著有山居紀難前後編及胡氏譜

藏家

胡氏族譜森楷案我珩以康熙九年卒年四十九而其儼壽七十  
外而山居紀難編云與本州甲子科舉人袁雍同事考甲子是康熙二  
十三年遲十餘年當可及之特不能定其確在何年耳今亦未敢質言

也之